

## **Orang Melayu miskin, Malaysia seperti bukan milik Bumiputera - Tun Mahathir**

**Astro Awani**

**19 Jun 2022**

**Hilmi Malik**

KUALA LUMPUR : Malaysia dianggap bukan lagi milik Bumiputera apabila bangsa Melayu masih lagi dibelenggu dengan isu kemiskinan, kata bekas Perdana Menteri, Tun Dr Mahathir Mohamad.

Beliau berkata, situasi itu dapat dilihat apabila banyak tanah milik orang Melayu terpaksa dijual akibat isu kemiskinan.

“Orang melayu miskin kerana kita dapati walaupun kita mempunyai simpanan tanah Melayu namun kerap kali dijual dan sebenarnya dimiliki oleh orang lain.

“Seperti yang berlaku di Singapura yang sebahagian daripada Johor tetapi kita hilang Singapura sehingga menjadi negara lain dan dimiliki oleh orang lain.

“Orang Melayu di Singapura ketika itu tidak mampu nak kuasai kekayaan bahkan ingin memiliki tanah pun bukan dalam kalangan orang melayu,” katanya ketika sidang media Program Aku Melayu di Kuala Lumpur pada Ahad.

Ahli Parlimen Langkawi itu dalam masa sama berpendapat, kempen menghalang penjualan tanah perlu diperbanyakkan untuk menghalang aktiviti itu terus berlaku.

Melihat kepada senario ketika ini, Dr Mahathir menzahirkan kebimbangan berhubung masa depan bangsa Melayu di negara ini.

“Walaupun kita dapati ada beberapa kerat orang yang berjaya dan kaya tetapi umumnya orang Melayu adalah antara yang termiskin di Malaysia.

“Orang miskin adalah orang yang lemah dan apabila lemah mereka akan lakukan sesuatu perkara yang merugikan mereka,” ujarnya lagi.

Beliau dalam masa sama turut mencadangkan agar diwujudkan beberapa forum untuk dijadikan platform bagi membincangkan faktor kelemahan orang Melayu di negara ini selain mencari solusi berhubung masalah tersebut.

**© 2022 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/orang-melayu-miskin-malaysia-seperti-bukan-milik-bumiputera-tun-mahathir-367142>